



Gemeinsam Äntwert vun der Madame Justizministesch Sam TANSON, vum Här Policeminister Henri KOX a vum Här Educationnsminister Claude MEISCH zu der parlamentarescher Fro n°8087 vum 9. Juni 2023 vun den honorabelen Deputéierten Laurent MOSAR a Léon GLODEN iwwert Poursuite vun engem Mobbingfall géigeniwwer Kanner

1. Kann d'Regierung déi uewe genannte Fait'en bestätegen?

Jo, d'Regierung ka bestätegen, dass et am Nomëtte vum 7. Juni um Gebitt vun der Région Capitale zum genannten Iwwergrëff komm ass, an dass dëse kuerz drop an de soziale Medie verëffentlecht a gedeelt gouf. De Minister fir bannenzeg Sécherheet ass iwwer dëse Fall informéiert ginn an huet sech mat den aneren zoustännege Ministere concertéiert.

2. Wéi eng Poursuite si géint déi Schëlleg an d'Weeër geluecht ginn?

Den Dag selwer nach gouf bei der Police eng Plainte gefouert, wouropshin de Parquet Lëtzebuerg kontaktéiert ginn ass, deen d'Entscheidung getraff huet, den SPJ mat de weideren Ermittlungen ze befaassen.

3. Ass domat ze rechnen, dass och juristesch Poursuite géint Meta an d'Weeër geluecht gi wéinst der Verbreedung vun dësem Video?

Vu dass et sech bei dëse Faiten ëm eng lafend Affär handelt, spillt de „secret de l'instruction“. Deemno decidéiert aleng de Ministère public iwwer d'Opportunitéit, fir doriwwer ëffentlech ze kommunizéieren.

4. Wann et sech effektiv ëm Mineuren handelt, firwat kënnen dës net an der Unisec zu Dräibuer placéiert ginn?

- Kann d'Regierung eis confirméieren, dass d'Unisec zu Dräibuer voll ass?
- Wa jo, wat gedenkt d'Regierung bei dëser urgenter Problematik vum Plazmangel an der Unisec ze ënnerhuelen?

Am Zäitraum vum 1. Januar 2023 bis de 15. Juni 2023, ware während 36 Deeg all 12 Plaze vun der UNISEC beluecht. De Recht vun der Zäit waren nach Plazen an der UNISEC op.

- Si Vergréisserunge vun dëser Struktur virgesinn?

Am Kader vum neie Jugendschutzgesetz sollt d'UNISEC an e "Centre pénitentiaire pour mineurs" ëmgebaut ginn. Momentan gétt eng Analys vun de Besoine vun dëser neier Struktur gemaach.

5. Wann et sech ëm Schüler aus engem Lycée handelt, wat gedenkt den Educatiounsminister ze ënnerhuelen, fir esou Virfäll virzebeugen?

De Kampf géint de Mobbing an de Cybermobbing betrëfft déi ganz Schoulgemeinschaft an ass wichteg, fir d'mental Gesondheet vun de Jonken ze stäerken.

De Ministère fir Educatioun, Kanner a Jugend ass sech der Wichtigkeet vun dëser Thematik bewosst a setzt sech op villen Achsen an der Preventioun vu Gewalt a Mobbing an. Divers Projeten erlaben et engersäits, an der Schoul dem Mobbing an der Gewalt virzebeugen an anerersäits, den Encadrement an d'Begleedung vun Affer an Auteuren kloer ze encadréieren.

1) Campagne „Exit Mobbing“: eng Campagne, fir op Mobbing an der Schoul ze reagéieren a fir preventiv ze handelen

Eng Informatiouns- a Sensibiliséierungscampagne mam Numm „Exit Mobbing“ gouf dëst Schouljoer vum CePAS gestart. Dës Campagne adresséiert sech un d'Schüler an hir Elteren. Am Hierscht gëtt d'Campagne op d'Zilgrupp vum Schoulpersonal erweidert.

Wuelwëssend, datt et dacks schwéier fir e Schüler ass, sech engem unzevertrauen wann hie belästegt gëtt, ass d'Zil vun dëser Campagne d'Phänomen vum Mobbing ze enttabuiséieren. D'Affer sollen deculpabiliséiert ginn a sech traue, och innerhalb vum Lycée, no Hëllef ze froen. D'Zeien solle net méi ewechkucken.

Dës Aktioun huet als Zil, iwwert d'Konsequenze vum Mobbing fir Affer, Zeien awer och Auteuren opzeklären.

2) Campagne „Not Sharing is Caring“: eng Campagne, fir op d'Implikatiounen vum Deelen vu Gewaltvideoen opmierksam ze maachen

Ufank Juli lancéiert den Educatiounsministère eng Campagne an Zesummenaarbecht mat der Police an dem Parquet, fir iwwer de Phänomen vun de Gewaltvideoen opmierksam ze maachen. D'Zil vun der Campagne ass et, jonk Leit ze z'encouragéieren, hiert Verhalen an dat vun anere Leit ze hannerfroen an Zivilcourage ze weisen, andeems si direkt reagéiere bei Gewaltdoten an net ewechkucken oder suguer een Deel vun der Gewalt ginn. D'Campagne, déi iwwer déi sozial Medie gedeelt gëtt, enthält zwee Kärmessagen:

- Wann s du Zeie vun enger Gewaltdot gëss, ruff d'Police!
- Wann s du ee Gewaltvideo geschéckt kriss, da schéck en net weider, fräi nom Motto „Not sharing is caring“

3) Richtlinnen zu de Vertraulichkeetsregelen an der psycho-sozialer an edukativer Praxis

De CePAS huet Richtlinnen op Grond vun der besteeënder Gesetzeslag zesummegeallt, déi der Uwendung vu Vertraulechkeetsregelen am Kontext vun der multiprofessioneller Zesummenaarbecht am Lycée déngen.

Dës Richtlinnen erméiglechen e gemeinsaamt Verständnis vun de Schüler, den Enseignanten, der Direktioun an dem psycho-sozialen an edukative Personal zu de vertraulechen Informatiounen a sensibelen Donnéeën, déi duerfe gedeelt ginn an déi net duerfe gedeelt ginn am Kader vun der Betreuung vun de Schüler.

Dës Richtlinne beschreiwen och Fäll, an deenen d'Beruffsgheimnis seng Limitten huet a wou d'Situatiounen bei den zoustännegen Autoritéite musse gemellt ginn.

4) Aféieren vun engem « Délégué à la protection des élèves » an all Lycée

Dat rezent modifizéiert Lycéesgesetz gesäit vir, dat all Lycée d'Funktoun vun engem Délégué à la protection des élèves (DPE) aféiert. Déi designéiert Mataarbechter aus de SePAS oder den SSE, déi dës Funktioun iwwerhuelen, hunn d'Missioun, d'Rechter vum Jonken ze promovéieren, ënner anerem, iwwer d'Aféierung vun engem interne Schutzkonzept. D'Schoulgemeinschaft gëtt sensibiliséiert, wéi d'Schüler géint all Form vu Mëssbrauch a Gefor kënne geschützt ginn. Den DPE dréit déi néideg Informatiounen un d'Schoulacteuren erun an ass de privilegiéierte Gespächspartner wann et dorëms geet, fir d'Schoulacteuren am Handele géint Gewaltsituatiounen ze ënnerstëtzen an ze beroden.

5) Pilotprojet „Bientraitance“: preventiv an disziplinaresch Moosnamen an der Schoul

Am Joer 2022 hu véier Lycéeën um Pilotprojet „Bientraitance“ deelgeholl. Dëse Projet bitt de Fachleit pedagogesch Instrumenter un, fir dat generell Schouklima ze verbesseren, d'Rechter vun de Jonken ze schützen an d'Schoul, duerch d'Reduktioun op Mobbingsituatiounen, als e séchert Liewens- a Léierëmfeld ze stäerken.

D'Zil vun der preventiver Moosnam Espace de parole régulé (EPR) ass et, d'Empathie an déi kollektiv emotional Intelligenz bannent dem Klassegrupp ze stimuléieren an de Grupp staark ze maachen, fir selwer Léisungen op Konflikter tëschent de Schüler ze fannen. D'emotional Reguléierung vum Einzelnen an och der ganzer Klass gëtt heiduerch direkt am Schoulalldag gefërdert.

D'EPR-Moosname maachen et och méiglech, Situatiounen vun emotionaler Nout fréizäiteg ze identifizéieren an eng gezielt Prise en charge a Berodung beim SePAS unzufroen.

D'Zil vun der disziplinarescher Moosnam Conseil d'éducation à la citoyenneté (CEC) ass et, dem Auteur d'Méiglechkeet ze ginn, no enger Transgressioun vun de Schoullregeln seng Dot erëm guttzmachen am Kontext vun enger edukativer Moosnam an als „Bierger“ Verantwortung fir säin Handeln ze iwwerhuelen. De Conseil vum CEC funktionéiert als pedagogesch Struktur, déi op eng partizipativ Manéier Moosname festleet, déi eng „sozial Rehabilitatioun“ vum Jonken erméiglechen.

Den CEC gëtt complémentaire zu den disziplinaresche Moosname vum Conseil de discipline agesat.

6) BEE SECURE

Zënter Joren intervenéieren d'Formateure vu BEE SECURE a Lycéeën an am Fundamental, fir iwwert d'Gefore vum Internet, vun de Soziale Medien an neien Technologien opzeklären. Formateure vun BEE SECURE kënnen direkt vu Schoule gebucht ginn a bidden eng divers Palette vu Formatiounen un, esou dass d'Offer un d'Besoinen vun der jeeweileger Schoul oder Klass kann ugepasst sinn. Fir um neiste Stand vun den Technologien ze bleiwen, entwéckelt BEE SECURE seng Offer ëmmer rëm weider an traitéiert dohier och d'Phänomen vun de Gewaltvideoen a senge Coursen.

7) Permanenten Aarbechtsgrupp mam CoDir an de Chefs de département EPS

Fir zesumme mat alle concernéierten Acteure géint Mobbing a Gewalt an de Schoule virzegoen, huet de Ministère fir Educatioun, Kanner a Jugend ee permanenten Aarbechtsgrupp an d'Liewe geruff, fir gemeinsam Reaktiounen op Gewalt- a Mobbingphänomener ze fannen. An dësem Grupp sollen och Méiglechkeeten ausgeschafft ginn, fir Jonker ze ënnerstëtzen, déi een net adaptéiert Verhale weisen.

8) IFEN-Formatioun zum Thema Gewaltvideoen

Ab Hierscht lancéiert den IFEN eng Formatoun, déi an Zesummenaarbecht mam Ministère fir Educatioun, Kanner a Jugend, der Police an dem Parquet ausgeschafft ginn ass. An dëser Formatoun, déi sech haaptsächlech un Enseignanten aus dem Secondaire riicht, ginn d'Prozeduren a Fäll vu Gewalt rappeléiert, d'Prise en charge vun deene Jonken erkläert a Preventiounsusätz gedeelt.

Lëtzebuerg, den 11 Juli 2023.

D'Justizministesch

(s.) Sam Tanson